

編號 3 號

【拈田螺】郭亭好原作

蓋久毋識歸草地，記得草地个風特別涼、天特別青。熱天偌同老妹不時分烈烈个日頭逐去大樹下庇，坐在阿爸用粗麻索編樹枋仔做个晃槓仔項，一個人拿一支涼沁沁个枝仔冰，緊舐冰緊吊晃槓，涼涼个風吹過來，還有樹頂項歸陣仔蟬仔在該「揆揆衣、揆揆衣」唱歌仔分偌聽，有時節屋簷鳥、白頭公這兜也來鬥鬧熱，毋驚人个膨尾鼠，也會在樹頂項上上下下、跳來跳去。

還毋曾讀書个偌同老妹歸日仔跔等阿公、阿婆爻，有一日阿公愛去巡田水，問講想愛跔佢去拈田螺仔無？好搞个偌隨應好，老妹也講愛跔。阿公跋上棚頂个閒間，搨出兩雙細水靴筒來分偌等換，過拿兩頂草帽分偌等戴，佢自家也戴一頂大笠嫲。

阿公肩頭擎等鑊頭行頭前，偌同老妹一儕攞一隻細錫桶跔背尾，偌等歸路仔啦歌哩曲蓋歡喜，阿公笑咪咪仔阿腦偌等唱來還好聽，偌等也風神啊緊唱緊大聲。行到伯公下，脣口該平洋洋个禾田，就係阿公耕个田，阿公指等田脣壩坑裡背講：「你等看這仔就有田螺仔好拈也，跔等這細壩坑直直下去，有盡多田螺仔好

拈喔！」阿公還無講煞，老妹就好絕絕仔<sup>1</sup>先跳落壩坑裡背去開始拈也！

偌同老妹相拚看麼人拈過多，兩儕就頭剷剷仔拚命拈緊拈，驚怕分人逐過去，麼人也毋認輸。一下無堵好，老妹个水靴筒嘎濕入爛泥肚，水靴筒裡背張入滿滿个爛泥，老妹想愛掛腳同鞋擱跔來，嘎仰仔都擱毋跔，還緊潔緊深，佢大聲喊偌過去同佢搨手，偌擱等厥大腳髀兩儕共下出力，結果鞋無擱跔來，兩儕嘎橫啊四腳惹天，搨到歸身仔溼溼還合泥棍棍仔，連面也舞到像烏貓公樣仔。阿公看著共快行兼來同偌等擱跔起來，過用手定定仔同老妹个水靴筒撈起來。阿公講：「你這兩個孤盲猴，等下歸去，偌就食若婆毋燥也！」

驚分阿婆罵，歸到屋下偌等兩個人偷偷囡囡趨入屋肚去，阿婆影著兩隻烏貓公歸來也，又好譴又好噓，喊偌等共快去洗身，同歸身仔烏疏疏个衫褲換下來。該載好性體个阿婆無發譴，毋過，還記得該日洗身洗啊蓋久，硬硬會鑪核一層皮也，歸身仔還略略仔有臭泥味，這下偌見看著田螺仔就會過恸著這個生趣个事。

<sup>1</sup> 好絕絕仔：音 hau qied qied e'；極欲表現的樣子。